

17 наурыз – Тарихқа тағзым күні

«Бүгінгі қазақ халқы – сонау есте жоқ ескі замандарда-ақ тұлпарлардың тұяғымен дүниені дүр сілкіндірген көне сақтардың, ежелгі ғұндардың, байырғы түркілердің ұрпағы, үлкен үйдің қара шаңырағын атажұртта сақтап қалған халық», – деп сонау 1992 жылдың өзінде, тәуелсіздіктің таңсәрі шағында, Дүние жүзі қазақтарының бірінші құрылтайында Елбасымыз айтқан еді. Осы жылдардың өн бойында тарихқа құрметпен қараудың, өткенімізден өнеге алудың үйренерлік үлгісін көрсетумен келеді.

Еліміз жаңа тарихи кезеңге аяқ басты. Қазіргі заманның бір ерекшелігі – жаһандану үдерісінің белсенді қарқын алуы. Бұл – ширек ғасыр бойында өз алдына дербес ел болған мемлекетіміз үшін аса жауапты шақ екені даусыз.

Тарих – заманның зердешісі де, шежірешісі де. Ал сол тарихтың қоныс тепкен жері – архив. Бабаларымыздың өмірі мен олардың ғажап өркениеті жөніндегі деректі құжаттар әлі де болса ғылыми айналымға толық түскен жоқ. Олар әлемнің бүкіл архивтерінде өз іздеушілері мен зерттеушілерін күтіп жатыр.

Бүгінгі архив қызметі «шаң басқан архив» стереотипіндегідей емес. Күн сайын заман талабына сай жаңарып, қызметі түрленіп жатқан қызу жұмыс ортасы. Көзге көріне бермейтін, бірақ қоғам үшін маңызы алуан еңбек.

